

Mahathir: Jangan terperangkap dengan kemewahan

'Gunakan punca negara untuk pembangunan'

BH 30 MAY 1981

KUALA LUMPUR, Jumaat — Timbalan Perdana Menteri Datuk Seri Dr. Mahathir Mohamad menegaskan negara-negara membangun tidak seharusnya terperangkap dalam satu-satu keadaan kemewahan, tetapi haruslah menggunakan punca-punca negara untuk membangun negara masing-masing.

Dalam hubungan ini, beliau berkata negara-negara membangun tidak harus sentiasa meminta bantuan dari negara-negara perindustrian untuk mendapatkan pakar dan bantuan.

Negera-negara

membangun mempunyai pengalaman dan kepakaran yang patut digunakan secara optimum, katanya.

Datuk Seri Dr. Mahathir berkata mereka haruslah sama-sama menggunakan punca-punca antara mereka.

Timbalan Perdana Menteri berucap di majlis jamuan meraikan Presiden Republik Maldives, Encik Maumoon Abdul Gayoom di Bangunan Parlimen di sini, malam ini.

Datuk Seri Dr. Mahathir berkata negara-negara membangun kini menghadapi masalah ekonomi yang sebahagiannya boleh dianggap mendesak.

Kenaikan defisit perdagangan, kos pinjaman

yang tinggi, perkhidmatan pinjaman bertambah dan kerosotan bantuan pembangunan adalah antara masalah yang sedang dihadapi, tambah beliau.

Jelasnya, masalah ini tidak boleh diatasi secara bersendirian tetapi apa yang perlu ialah kerjasama di kalangan mereka.

Timbalan Perdana Menteri berkata per-saudaraan dan perpaduan Islam hanya akan bermakna jika adanya kerjasama yang ikhlas.

Kerjasama seperti itu akan tercapai sekiranya anggapan terhadap kerjasama ekonomi itu sebagai kerja-kerja amal dihentikan, katanya.

Tegasnya, perpaduan Islam sebenar hanya

akan tercapai melalui kerjasama yang padu, bergantung antara satu sama lain dan berdiri teguh di kalangan negara-negara Islam Ketiga.

Datuk Seri Dr. Mahathir yakin pertolongan yang diberikan antara satu sama lain akan menyumbangkan ke arah penyusunan semula ketidakadilan peraturan ekonomi antarabangsa.

Beliau juga mengulangi kebimbangan mengenai keadaan di Asia Tenggara berikutan konflik yang berterusan.

Katanya: "Dalam hal ini Asean akan terus berusaha mencari penyelesaian secara politik di rantau ini."

Beliau juga menyatakan Malaysia menyokong usaha menjadikan Lautan India sebagai kawasan aman dan stabil.

Menurut beliau, kewujudan awal kawasan tersebut sudah tentu bersesuaian dengan konsep Asean ke arah mewujudkan kawasan aman, bebas dan berkecuali di Asia Tenggara.